

明名臣言行錄

明名臣言行錄卷第四十七

尚書秦端敏公金

字國聲無錫人弘治癸丑進士官至南京兵部尚書卒年七十有八贈少保諡端敏

童時穎秀不羣見兒戲却避之端默自若父授之啓蒙諸書退爲家人解卽能了其大義一日父對客以陸續命課一詩公援筆立就滿座驚嘆謂爲神授丁母憂毀瘠如禮自爲立傳

丙午弱冠登應天賢書弘治癸丑登第故相徐文靖溥在位召試館職公以父老急歸省不就文靖愈器重

之嘗謂人曰釋褐新進能知忠孝大節不有秦氏子
耶乙卯授戶部主事監督倉場糧斛差勘順天災傷
總視諸司章奏事無難易摹畫悉當遷員外郎郎中
正德中宦戚奏乞鹽引每從中報下阻商耗邊鹽法幾
壞公當署堅奏格之擢河南按察副使督學政訓迪
有方與前任邵文莊公齊名中州人稱秦邵云

庚午陞左叅政分守大梁道劉賊起畧河洛間將薄封
丘公設法防禦會叅將宋振提師南下因邀與合陣
遇賊于陳橋奮擊大破之土人立祠祀公陞山東右
布政

甲戌陞都察院右副都御史巡撫湖廣贊理軍務疾二
僕以從所至問疾苦誅奸貪威讐惠流奏上便宜八
事繼上十事皆艱危切務巨盜盤結四面蜂起乃擒
賀章廖珙于江討猺叢於郴桂靖叛苗于香爐峰其
功最著

己卯逆濠告變大駕親征中官李鎮附麗彬賊橫肆誅
求禍且不測抗辭直奏請以一身當之民免于毒庚
辰陞戶部右侍郎辛巳改吏部尋改戶部左攝部事
清理勲戚莊田禁革勢要鹽引創籍勾稽兩直隸十
三省逋負國用漸充錄郴桂功廕一子爲錦衣衛世

襲百戶公辭免

嘉靖癸未陞南京禮部尚書公與同官以災異上言陛下臨御未幾政漸弗恪一言詔令不如初二言任賢不如初三言聽納不如初四言愼惜不如初五言持法不如初六言恤民不如初七言崇正不如初八言保養不如初九言陛下初政所以清明者政出公朝而左右不能預也今政不能如初者政在左右而公朝或不知也臣等切惟政不可一日不在朝廷權不可一日移于左右自古帝王制馭天下操此術而已不然內廷外朝之勢隔而信任有所偏宦寺女謁之情

移而聽受有不察名曰總覽而權實下移矣上是之
改南兵部尚書參贊機務不踰年召爲戶部尚書條奏
國儲數事今尚循守不變丁亥年六十有一上疏乞
歸賜璽書乘傳歸命有司歲給輿隸大臣及臺諫詣
闕請留不報公旣歸言者不止復起南京戶部尚書
廟工興改工部尚書加太子少保再改南京兵部尚
書以年七十據禮引謝奉溫旨賜歸仍給輿廩如初
以嘉靖甲辰卒

尚書趙莊靖公瑱

字庭實號西峰安福人弘治庚戌進士官至工部尚書卒年七十贈太子少保諡莊靖

從父恆齋官蜀之黔江過石首舟觸漲濤公墜水流半里許不溺見者驚異讀書僧寺得賈人金囊于佛殿默坐其處須臾亡金者來物色審之良是卽付之賈探囊爲謝麾去

癸丑授都水司主事督呂梁洪置夫數千半爲土豪隱占甚至侵偏署傍隙地公召至諭以法豪憚威革心無敢後者

丙辰改兵部武選勵清操精選法吏胥斂服罔敢售其
奸戊午遷職方司員外郎大司馬鈞陽馬公極器重
之薦堪大用

擢知濟南府府有黠吏能舞文爲政蠹守莫能制公預
選吏農性朴敏者教之法律踰年得可任者二十餘
人遂盡逐積猾吏宿弊革殆盡

海豐有殺人而逸者誣逮者籍戍久之潛歸有司獲以
解府公察其罪密使人緝得渠惡伏辜戎者獲釋

漢庶人牧田故是海豐民田旣入宮王府復奏乞公迄
以歸民兩巨璫以選婚至郡皆憚公戢不敢肆府庫

積銀至二十萬有奇廩粟三倍之冊載詳明無毫釐
爽後雖逆瑾查盤羅織竟不能中傷丁卯春陞順天
府丞忤逆瑾削職歸里瑾誅復職

陞右僉都御史撫宣府革官吏冒收積弊歲省軍儲萬
餘石調撫山東黃河退灘地數百里最沃壤集流氓
使墾爲田許復其業倖臣錢寧令家丁鬻鈔禁弗得
售

黃陵岡河變運道幾危擢工部右侍郎兼憲職奉勅總
理受命之三日卽趨河上躬率官民三月胼胝水勢
稍退貽文河伯與共責任數日狂流壅沙護岸三埽

告成人以爲神

辛巳轉本部左侍郎署部事奏毀鎮國府玄明宮并香房酒店保安洪福諸寺院泊諸樓奸廬舍以備國用以紓民力修濬城池街道溝渠以至宗人府詹事府國子監城隍廟凡圯壞街宇一新葺之京師改觀

壬午陞本部尚書故事工曹錢穀出入漫漶無所稽乃令所司各具簿相覈驗凡大興作悉自計畫損裁俱多乙酉冬二品三載考績奏上遣中官賜羊酒累沐恩賜文獻通考敬一箴資治通鑑御製洪範序獻皇帝睿筆皆一時殊遇也

公在部剛正自持利害不動止顯陵之遷免東廠匠價
之追諫建戚畹第宅省差官陝西織造章凡數十上
以是忤中貴人意乃乞休居五年召復本部尚書以
疾辭不赴卒于家

尚書蔣恭靖公瑤

字粹卿湖州歸安人

進士官至工部尚

書卒年八十有九贈太子太保諡恭靖

公守維揚類多惠政適武宗南巡諸省騷動凡乘輿供
御及宦寺親軍賂遺莫可貲算公曰備亦罪不備亦
罪備則患及于民不備患止於身乃僅鳩供應之具
不復橫斂以取悅

駕至淮安太守薛贊沿河皆拆去民房以便扯船繚皆
索民間絹帛兩淮爲之大擾過揚州公爲太守獨不
拆房曰沿河非聖駕臨幸之地扯船自有河岸可行

何必毀壞民居有罪知府自當之江彬傳旨要揚州報大戶公曰揚州只有四箇大戶其一是兩淮鹽運司其二是揚州府其三是揚州鈔關主事其四是江都縣揚州百姓窮別無大戶江語塞其事遂寢揚州按堵如故

江彬怙勢索賂不與舉所賜銅瓜脅之公不爲動已武宗出漁得巨鯉戲言可值金五百彬請以與守令如數輸值公獨脫其簪珥及數縑以進曰臣府庫絕無自辦此耳武宗笑而釋之

江彬又欲奪薩氏居創建督府以張威福公力持不可

彬怒益甚屢譖公幸聖明知公有素畧無所入郡有
瓊花觀旨取瓊花以觀公以帖紙立書此花生於某
年爲瑞應至徽欽北轅此種已絕今止存其名也上
默然又一日中貴出揭帖索取胡椒蘇木若干斤其
他奇香異品產自殊方者不可勝數蓋欲卽其所無
者以困公冀得厚賂時撫臣邀公使他求以應公曰
古任土作貢出於他方而故取于揚守臣不知也時
撫臣厲聲令公自覆公卽具揭帖註其下曰某物產
在某處揚州係中土偏方無以應命時上垂簾坐行
宮中貴以揭帖進悉如公言以激上怒上曰可問蔣

瑤晒白布何處出也乃進布五百疋以杜他請又中
貴言欲選宮女數百人以備行在撫臣欲選之民間
公曰必欲稱旨止臣一女以進上知其不可動卽詔
罷之

方迎駕時公布袍小帽奔走承應若奴隸然甚至自夜
達旦百姓觀者恨不能以身代之旣扈送由淮涉徐
步行露宿辛苦萬狀幾瀕于死而揚人德公更生立
祠肖像焉會陞陝西叅政揚民皆遮道泣留蓋誠心
感人至此

公與中貴人會勘民事中貴受賄欲死被誣者公潛戒

行杖者曰我命汝筭數多汝須勿重其人死我亦死
汝輩被誣者得獲全中貴大悅而罷其圓機應物如
此

乙酉陞副都御史巡撫河南戊子擢掌南京都察院事
又晉司空明年駕幸承天則掌行在工部印其寵渥
委任如此公自始任歷九官皆有節惠可稱如奉使
却楚王之饋守荆而流賊慕其名不敢犯境者再又
築黃潭隄防水患至今受其利者猶能誦之載於志
傳甚詳

公前守揚時有市兒放紙鳶偶落公帽一婦自樓瀉水

誤濺公衣左右欲置之公語以勿問其度量汪洋豈
非所謂清之不濁而澄之不清者乎庚子年七十二
遂致政歸居家絕迹公府約南坦劉公箬溪顧公等
十五人結社于峴山逸老堂其接人惟和氣謙德無
不傾心愛敬

尚書方簡肅公良永

字壽卿號松厓福建莆田人弘治癸丑進士官至
南刑部尚書諡簡肅

授刑部主事轉員外郎擢廣東按察僉事瓊賊符南蛇
作亂衆至四萬守吏多棄城走公慨然請行時劉大
夏總督兩廣遂委攝海南兵備公統所部兵紀律嚴
明他軍莫及比及三載縛其元兇前後擒斬二千數
百有奇所獲生口牛馬器械稱是尋推補爲真公歷
二道每行部所至一切行李皆令官屬籍記比還令
啓篋視之以絕點污丁父艱歸

戊辰服除赴補時逆瑾用事外官朝見畢必謁瑾又候謁其私第至匍伏拜跪公入朝鴻臚導詣左順門叩頭畢卽令東向揖瑾公徑趨出瑾固銜之至旅寓或勸循例謁瑾者公曰身可死官可棄禮不可屈也瑾益怒及吏部除補河南信陽等處兵備撫民僉事瑾從中下旨曰是官非額設者良永敢營求謀補著令致仕去公去瑾怒未已會海南有愬人命事欲用此中公遂奏遣錦衣千戶刑部郎中各一員往勘之郎中周敏力明公無罪乃免

瑾誅起爲湖廣按察副使藍鄙諸賊寇蜀兩省動兵時

洪鍾爲總制林俊爲巡撫捉赴軍門詳議藍鄆平公贊畫爲多河南劇賊趙璫走湖湘間削髮自匿公計擒之

擢廣西按察使巡按御史朱挾勢多爲不法公率三司暴其奸御史遞去

遞轉浙江左布政幸臣錢寧遣僕鬻鈔于浙索銀三萬兩公具疏言今四方羣盜甫息瘡痍未瘳邊塞多虞浙東西諸郡自冬徂春雨雹爲災蠶麥不利待哺之民嗷嗷千里此何時也臣苟隱忍不爲陛下言之則已歛之財必入朱寧之手而民心傷矣民心傷則邦

本搖動陛下寧不爲之寒心乎臣聞寧席寵以來陛下之賜予無算四方之餽遺不訾篋笥之中必不少此又不病狂喪心何乃爲此負恩之賊伏乞陛下割偏私之愛下之詔獄明正典刑仍乞急行巡按浙江監察御史會同鎮守三司等官將已歛鈔銀盡給還民則民怨猶可慰解臣死且甘心如不以臣言爲然置之不問日復一日尾大不掉必蠶食天下肆無厭之求出於尋常所不料者陛下於是悔之晚矣疏入寧頗懼乃委過下人遣衛卒追前所發鈔而以價銀還之民時寧怙寵恣橫舉朝無敢言者獨公亟攻之

寧憾之不置公三疏乞休以避其害友人黃鞏稱公此疏足落權奸之膽宇宙間不可無此一舉

公家居閔邸報見時事日非憂形於色時逆濠結寧爲與援公策濠反必犯安慶謀據留都會門生林同知有祿除安慶公教之宜密爲備已卯濠叛果如公策以有備卒敗歸人多服公先見濠旣擒寧亦伏誅

世廟登極用薦擢都御史撫治鄖陽等處尋廷推提督操江又推兵部侍郎而公復以母老乞終養疏請者再上重違其意乃許侍養家居言官部使者奏薦無虛歲最後都御史姚鏌請於常格之外顯示褒獎吏

部尚書喬宇戶部尚書孫交言公居官素謹家無贏
餘宜依廉官侍郎潘禮孝養御史陳茂烈例月賜食
米詔有司月給米三石辭免不允久之母卒上聞遣
官諭祭命有司營葬大臣未任授恩又以廉孝賜月
米皆一時異數也服除命總理糧餉兼巡撫應天等
府地方中道疾作連疏乞休溫旨勉留再推南刑部
尚書而公卒矣訃聞賜祭葬諡簡肅弟良節與公同
年舉進士仕廣東左布政使終官所居有績

尚書劉清惠公麟

字元瑞金陵廣洋衛人弘治丙辰進士仕至工部尚書卒年八十有八贈太子少保諡清惠

第後初觀政時外戚張氏驕橫慨法臺諫擊之逮治甚急公與歸安陸崑抗章申救敬皇爲之霽威事尋得解除刑部主事進員外郎錄囚畿內所疏雪冤滯無慮數百人

轉郎中擢守紹興漢劉寵故處也在郡精核廉敏甫五月郡聲大和逆瑾銜公出守不修謁猶掇郎中時瑣細廢爲編氓郡人爭致贐公曰勤苦諸君吾治不逮

前劉敢蒙一錢惠耶旣去越人肖像爲小劉祠時與
龍霓及湖人吳琬施侃陸崑交因徙居於湖山人孫
太初亦以羈旅入社爲湖南五隱瑾誅起知西安遭
內艱去郡

服闋遷陝西叅政屬關內饑鹵數浚入朝遣貴臣督兵
將厚賦軍興諸司莫敢異公曰靖邊本以衛民也民
可先困乎使者色沮會有赴闕陳訴者命與叅政共
圖其便議遂寢公亦嚴覈侵漁括逋負邊儲竟以不
乏

嘉靖初起爲太僕寺卿擢副都御史巡撫北畿復引疾

章至三四上始得請時論方高公才節再起爲大型
寺卿改刑部右侍郎尋陞工部尚書水衡泉貨之府
高潔士頗避之公咨白吏部盡選才廉充曹任仍請
築外帑刷四司之財貯之特銓主事一人與臺臣同
典出納上嘉公意賜庫名曰節慎實自公始凡工部
上供率關內府所徵多淆典式不受覈公條上最甚
者十二事得旨裁之中貴人用此銜公會上遣近璫
督造龍袍於蘇松公請罷遣忤旨勒令解職

公歸益遠世紛里中不復知有鉅公者惟灌畦賦詩爲
樂嘗請王公廷相預作墓銘好樓居而力不能作友

人文徵明寫層樓圖遺之常懸之壁命曰神樓賓至則陳法書名墨以爲娛叩以時事不答公卿交薦公不知也性清約疏布自喜事繼母戈遇異母弟鳳尤篤恩禮先人田廬悉以委之絕不以豐約爲志

大宰李默言公僦居溧陽嘗遣門人候之公引至臥內見四壁惟掛書數束他無長物又二十年觴予峴山逸老堂了無宿具旋以乳羊博市沽風雨蕭蕭欣然達夜其風尚如此

公故人龍西溪霓有弟歸葬公送之柩臨發公向扶柩諸人曰列位大哥有勞你擡我龍三哥穩當些遂雙

賤賤下高義邁古今矣非特以貴下賤爲可稱也

尚書朱恭靖公希周

字懋忠崑山人弘治丙辰進士第一官至南京吏部尚書卒年八十四贈太子太保諡恭靖

公自少岐嶷不凡識者知其大器年二十四中會試有人送宋鑑云司馬公五規不可不看公遂熟讀全文後制策果有此段公遂備書之閣下徐劉二公得其卷稱爲博學薦爲第一授修撰壬戌同考會試明年以修會典成陞侍讀充經筵講官中遭逆瑾煽虐撼制詞僚公不屈從中奪公官一級仍爲修撰孝廟實錄成復公官如故庚午主應天鄉試

已卯改南禮部侍郎時條議大禮更定尊號公等上疏
曰本生二字無貶也惟恐妨于正統故默寓夫親親
之意陛下考孝宗母張太后三年矣興獻帝興國太
后再上尊號斷自宸衷告之郊廟社稷詔頒天下未
及三月忽復更定無以孚天地信後世上不允乙酉
陞南京吏部尚書前後內閣大學士員缺博咨舊學
公言盈庭數以公與熊峯石公瑤序菴李公時對二
公果相而公遭會未能蒼生之望缺如也

公在南銓當丁亥考察媚嫉者譖言于上謂南科無一
人之去以爲公私公乃力辨其非曰察僚庶以別賢

否非論曹局之有無也使一曹皆賢必去一人以爲公則一曹偶皆不肖亦將姑去一二以塞責乎詞嚴義正聲震朝堂上亦不之譴仍聽公稱疾東歸勅有司歲給夫廩恩數之隆今時未有也

公歸吳趨里中市貨溢衢紛華滿目入公之堂蕭然如村落中見野翁環堵出與賓客游魚魚雅雅宛如崑山舊弟子里中後生思畏名簡欲一有爲則曰恐玉峰先生知之

先墓在陽抱山乃密邇丘廬結宇謝客惟以山水文籍自娛每日朕則小史進觴退立戶外觴乾復進餘酌

習以爲嘗諸非其好也先是公居京師皇考觀察公
訃聞自旅邸至張家灣徒跣行百餘里時以爲難
歷宦餘四十年田廬一仍先舊未有加焉自錢夫人下
世卽不娶而室亦無姬媵生平恬素純一無細大過
舉聞巧詐淫佚之事輒挺然不信曰世豈有是哉吾
不知之也老隱陽山幾三十載中外薦牘以百計公
竟不起臨終戒其子毋請恩于朝倘朝廷易名願勿
以文爲諡犯吾父諱故今諡恭靖從公志也

公初舉狀元畧無喜色歸里中惟徒行人甚器之後爲
禮部侍郎家人載席一車爲公買宅費進都城宦者

阻之且云必得一刺以別真僞公弗許家人云必入
乃得利公曰不得利又何傷乎竟止于城外

衡山嘗對人言我輩皆有過舉惟玉峰混然一純德人
也

公家居時提學將按臨其夫人謂公曰今兒輩將考試
可對府縣一言公搖手止之曰且低聲毋使蒼蒼聞
之我輩有勢力者行請托將置孤寒何地乎卒不可
其制心如此

侍郎周公廣

字充之號玉巖蘇州崑山人弘治乙丑進士仕至
南京刑部右侍郎卒年五十八

公生而英邁迥異羣兒長舉進士觀政兵曹覩大司馬
東山劉公直道而行卽砥礪名節不諂流俗旣授知
莆田道出閩者例謁鎮守時率行重賄公徒手無贊
言動端凝廉正自束兼以宓子賤爲師日禮耆儒用
資啓沃周爰詢謀下及庶民莆中利病罔不聞悉諸
所興革咸飭人心方及期月母卒於官貧無棺殮鬻
內釵釧始克昇歸以葬服闋改知吉水政益詳敏時

贛州流賊自大帽山突出路由雩都抵新淦抄掠永豐勢甚猖獗吉水丞簿欲奔竄士民洶洶亦無固志公面加叱責要盟神祠衆志始定戮力禦賊賊乃潛師踰境邑賴以完厥後藩臬上功督府不及公公亦漠然

正德壬申以天下守令治行第一擢浙江道監察御史是時佞倖錢寧居中用事巨寇劉七輩暴戾恣睢橫行江淮河濟殺人或盈城野公抗疏四事一斥喇嘛番僧宜屏四裔以禦魑魅二遠伶人賤工至引唐莊宗事以警三重國本以廣儲嗣不得育螟蛉義子如

宦豎蒼頭錢寧者其殺刺皆書曰皇庶子僭擬東宮
之罪擢髮難數四嚴軍令言諸禦寇者皆無恙而川
原白骨積如丘山疏入寧大怒幸上不深罪止謫懷
遠驛丞寧陰使刺客欲遮刺之乃微服出城變易姓
名被道流衣誦觀音經枵腹三日乃得脫歸旣抵懷
遠莽無館舍寓居佛宮間與同志泛崖門登西樵跨
羅浮夷猶白雲之巔然驛通番藝朝貢每外使至咸
慕其名或以奇貨爲獻峻爲拒絕使益敬憚

時武定侯郭勛鎮嶺南承望風旨僞以白金試公公拒
不受一日攝公閉府門箠擊之幾死行省官惕息莫

明倫彙編 家範典 卷四十七
敢救御史有言而解

甲戌移知建昌縣是時宸濠將叛謀復護衛遣使繹絡道路肆行征求每經建昌輒加裁禁民賴以蘇丙子八月吏部擬擢憲職寧內構陷批根往事復謫竹寨驛丞竹寨在潞山叢棘中亦無驛舍居民數家靡所寄止乃誅茅爲屋依山面沅日與其徒講學論道暇則登陟崇岡俯臨幽壑超然遠覽無所傾慮

辛巳世廟卽位首舉遐遺詔復御史尋陞江西按察僉事至則斥貪吏疏滯囚去淫祠放尼覲數百歸之宗令市其菴業士明年轉九江兵備副使尋改提學其

綜理學政躬自爲範誨人務明義利及其校藝必參德行時天子勵精圖治凡藩臬守令治行卓異特降璽書褒嘉通天下止十三人公與焉

嘉靖乙酉陞福建按察使閩故多盜公至分部所屬伐其渠魁民庶用安乃又申勅憲章釐革蠹弊凡會獄獄齋戒禱神開釋冤抑叅伍之下咸得其情刑用不濫始至鎮守遺金漫不省置諸庫府比鎮守窘甚復返其金因以綱條解諭鎮守憚服其後有中官督織造者倚勢作威橫索民財有司莫能抗移檄禁遏及入省城繩其奴從不得侵牟於民民遂形諸歌謠

按閩三年擢右僉都御史巡撫江西振肅風紀百僚嚴
憚其商論政務虚心延訪雖屬吏亦多聽納其有才
賢亟爲薦揚於時富室豪右多買民田遺其原稅民
用大困乃下令稽覈且欲奏聞豪右不便交口騰訾
當道者遂援裁革例罷其巡撫因疏乞休上雅知其
賢且命吏部擢用已丑冬遂陞南京刑部右侍郎越
二年辛卯以疾卒於官舍寢疾時當大比三子皆應
試留都護侍湯藥未屬續前四日令趨治後事且曰
吾平生間關百挫屢瀕于死而不死今死於此命也
爾等慎勿俯仰當路以乞葬祭神間氣爽怡然而卒

侍郎陶莊敏公諧

字世和號南川會稽人弘治丙辰進士選庶吉士
仕至兵部左侍郎卒年七十三贈尚書賜祭葬諡
莊敏

年二十二領弘治乙卯省元丙辰庶嘗改授工科給事
中首疏乞緝熙聖學以裨治道極言治亂存亡之故
且請以大學衍義置禁中以備省覽未幾以父喪歸
起復會劉瑾輩竊權亂政疏劾之前後疏上若戒逸
游以保治安遠讒佞以一政令修人事以弭災異停
止不急工作以杜奸謀停止差官賣鹽織造等疏皆

直指羣邪欺蔽之罪無所顧慮瑾等大憾之以他事
誣陷廷杖落職爲民憾猶未已以在科時嘗巡視十
庫遂駕言缺乏布疋提解詣京下之詔獄拮据百端
誓死不爲動乃復杖謫戍肅州衛怡然就道瑾敗被
詔還家

世廟龍飛追錄耆舊陞江西按察司僉事區處發運南
京水兌省費鉅萬時豐城雷煥九者盜引爲窩法當
死以寃走匿公曰第無恐果寃吾爲爾辨之煥九出
公以雜諸隸中使羣盜認之不識明日復鞫之誠門
者執跛而矐者入盜叩頭曰是實賄我建昌獄中使

誣煥九煥九曰是同宗而有讐不意其爲此也立出
煥九罪又同宗有二商自遠歸其一商過舊館止食
竟不歸其家以先歸有謀訟之公推按館人不服見
館所畜鶚鵠能言使持刀詰之鶚鵠言積灰處啓灰
得屍事遂白咸以爲神公折獄平反類若此

轉河南按察司副使管理河道公立法於沿河皆植柳
以固堤又于大堤兩傍遍植葭葦採取倦掃以當草
束椿木則免樹商之稅給價徵納葭麻則以水利河
道贓罰紙米俱折糶麻費減用周無煩於民總理臺
臣奏請通行論者謂歲省費十餘萬

擢本藩叅政適太行賊陳卿爲亂山西河南二省當會
勦公默自定計師未進以奇兵擣之遂擒卿地方底
寧擢右方伯尋轉左

陞都察院右副都御史提督南贛汀漳等處軍務兼理
巡撫至則條數事請行曰重守令專分守寬農民懲
貪吏行之及期厥有成績乃遷少司馬仍兼中丞往
督兩廣羣盜橫恣掠破城庫甚者僭稱王號公至盡
心經度隨宜勦撫若西山瓊州連州古田南平七山
暨海賊凡七獲大捷斬俘總數萬計招降復業者總
二十餘萬計又添設建白等縣分屯固守以絕後患

反側旣平復謂廣右列壤遐僻文教未洽乃立嶺表
書院簡郡邑子弟之秀者親爲之訓誨務在廣揚德
化作其良心俾爲民表率士旣綏懷俗亦丕變至於
今賴焉

丁內艱歸起入贊本兵殫心武事思爲遠猷日夕考求
職方險要凡會議朝事侃侃必盡所見勿恤異同厭
俗流靡退食輒杜門不事交謁衆皆歎服稱爲古君
子居一年遇廟災懇乞避位奉旨致仕旣歸唯覽書
課農不求安逸族黨有貧乏者調之歲荒爲粥通道
以濟餓者存活甚衆嘉靖丙午十一月有疾將終強

起正襟端坐命取忠靖新冠易之遷於正寢而卒

侍郎劉端毅公王

字咸栗江西萬安人弘治丙辰進士仕至刑部左侍郎隆慶初贈刑部尚書諡端毅

公六歲時侍父方伯公側輒問天何依地何際終有壞否及聞元會運世之說則又曰後之人將奈何方伯大奇之笑曰童子何慮之遠也問侍客客有談及天下阨塞及運道可憂者趨而進曰勿使奸雄聞之客甚驚異其夙慧不凡如此

爲輝縣令力拯凋弊歲饑請賑不待報發粟已而郡官閔廩民恐爲公累爭先歸粟墾田勸耕奏蠲虛稅民

復業者累千計設教條十八事以興民行

召爲御史指揮胡震夤緣內降驟陞指揮使守備通州
公疏言倖門斷不可開且官以賄遷必將虐民償費
俄被旨巡視通倉具得震貪暴實跡劾奏黜之

乙丑按圻內諸郡太監吳忠選婚不敬亟以狀聞忠竟
罷境內多貴戚權宦皆肅然敬憚之會天變陳言六
事其一端治本清化原親大臣厲庶官擇內侍攘外
獎武宗嘉之

公復疏劉瑾等八黨煽奸宜寘之法而顧命大臣劉健
謝遷當委任疏入瑾大怒尋詔遂黨人遂罷歸復構

誣輸粟者三凡四百餘石旋逮下詔獄凡四月始免還

瑾誅起爲河南督學僉事轉福建副使督學如故敦本黜浮表揚靖難之節招降山海之寇召爲大理少卿所讞疑獄以卑幼引盜劫尊應從重論得俞旨著爲令

己卯改南京僉都御史提督江防聞逆濠變傳檄致詞有曰卽墨齊民尚能奮孤城之勇士房韓相豈可忘五世之恩毋惑流言自貽顯戮讀者無不感奮徵崇明舟百餘水兵千人募勇士合操以援安慶濠阻而

遯陽明王公旣擒濠簡濠籍公卿多餽遺賀啓惟公
介然無染

嘉靖改元召入以平濠功陞右副都御史尋擢刑部侍
郎大獄事起下詔獄罷歸卒於家

公學一主于誠常味齋戒二字謂動靜無間而誠乃可
得故終身無浮詞詭行廉潔之操始終不渝所居僅
庇風雨尤精于天文地理兵律儀章法制皆詳究其
本末惟所用之

布政使楊公子器

字名父號柳塘慈谿人成化丁未進士官至左布政使卒年五十六

除崑山知縣治行卓然以父憂去服闋除山西高平縣巡撫薦其才改治嘗熟縣三載致最召補吏部考功司主事正德丙寅轉驗封員外郎尋陞郎中每談治體自六部達諸鎮歷道其故及當變通之宜北鹵犯邊嘗陳邊務數十事馬鈞陽劉華容二公皆重嘆許弘治末多所建白至孝廟山陵方起聞有水石爲病上疏言之至下詔獄執不變未幾還原職

歷三邑因時立政盡然歸於禮法毀諸淫祠以其材充
廟學公署之用常熟稅入常後期令先輸者無耗期
日遞加旣乃以多益寡耗足轉輸而民無敢後矣東
南諸水由常熟白塘入海工侍淳安徐公常合四郡
疏利之會有漲沙當海口潮汐增淤水患如故便率
民間之比歲衝流日深水不爲患汴城苦遠汲鑿井
城中數十處皆得美泉又作屋以居織染貧匠其惠
利如此

爲考功郎中逆瑾勢方熾會有擬以翰林處之者聞之
亟爲書辭於內閣事因以寢識者避之

出爲湖廣辰常道會郴桂賊起遂請改道自効日暑
兵勦平之會轉河南時方以郴桂積勞成疾而京賊
方渡河天又寒甚有勸緩行者亟輿而往卽至嵩縣
居守賊方走湖廣曰賊必復向汝州洛陽籓籬備不
可缺乃自嵩馳赴之賊至方食登城晝夜調度手書
示城中人曰不上城及上而輒下者皆斬旣而有將
下從賊者卽斬以徇城守益堅遂引去其臨事應遽
如此

公沉默厚重風儀峻整而中實和易與人遊處恆掩其
短而揚其長於所論薦必密終不令其人知于自處

安分自足雅度恂恂爲縣官時則曰得倣此足矣爲
部屬官則曰得陞此足矣及爲方面官則曰得倣此
足矣子孫元赴京鄉試省公于汴囑之曰都下故人
有問我者可實以吾病告之且爲我寄語知已倘有
推轂幸爲我遲遲勿驟

公歷三縣俱有遺愛崑山有德政之謠高平常熟有去
思之碑且立生祠焉公聞之輒不樂曰以三原公盛
德尚或累于毘陵之傳某何人而可以當此在吳中
兒童婦女皆知公名述公異政爲嘉話嘗曰但官負
民耳民何負于官哉

平生企慕古人而疎濶俗士講求正學而排斥異端崇
尚道義而輕畧勢利孝友之行人所共知嘗諭諸子
曰若能孝弟勝于擢高科否則雖中三元亦何用聲
名在海內者幾三十年平居自奉服食不求豐美位
至方岳無異寒素訃聞于京朝廷大臣及士大夫皆
以公位不滿德才不究用爲惜

都御史陳察請謚名臣以勵世風事已故河南右布政
使楊子器資稟剛方學識敏博三爲大邑善政重于
去思十載銓曹才望藉于羣口歷中外因事建議裨
益居多亘始終持已克堅利害不計決疑金井特立

孝廟之終長跪禁門甘繫武皇之始居家惇崇孝友
趨朝恆勵勤勞凡著書務明大經其詠史尤昭往鑒
諡法應事有功曰敏博聞多能曰憲子器也請諡敏
憲可乎

明名臣言行錄卷第四十八

尚書廖僖靖公紀

字廷陳別號龍灣世居閩父瑄商于東光因家焉
弘治庚戌進士官至吏部尚書贈少傅諡僖靖

幼有至性好學不喜嬉飲爲樂登第時屠公總憲風裁
炳著少許可公觀政屬下獨器重之逮握銓柄首疏
公爲考功主事公亦節介不渝期副所薦鄉人有圖
仕者奉贄干謁公不辭旣乃完璧充贐以歸其清而
不激類如此歷遷考功郎中再轉文選雅不阿時宰
士類高之

陞太僕少卿太常卿皆有實政紀錄尋擢工部右侍郎督理易州山厰時歲羨餘將萬金公一無所染悉以上供因定爲例陞吏部左侍郎旣而擢南京吏部尚書頃又轉兵部叅贊機務凡勢權所役奪之俾盡還伍戎政用肅因人言求退章再上獲允

家居兩載起爲吏部尚書公感激益自磨淬值修憲廟實錄受命總裁事竣進太子太保賜鞍馬金幣丙戌請老上不奪其志加少保給人夫月糧以示優遇仍勅乘傳歸旣抵家日惟杜門研索古義嘗著學庸論孟管窺少業毛詩晚年尤嗜易訃聞賜祭九壇命工

部營葬恩禮弼至士林榮之

少保李康惠公承勛

字立卿嘉魚人弘治癸丑進士官至太子太保兵部尚書卒年五十九贈少保諡康惠

初知太湖縣陞南京刑部主事歷戶工郎中出守南昌時南昌難治劇賊驕藩內外孔棘公浚畧雄才迎機輒應正德六年贛賊犯新淦執叅政趙士賢靖安賊據越王嶺瑪瑙岸華林賊破瑞州公廣詞謀繕壁壘扼溪澗屢進戰擒胡雪二纔還府華林賊又叛殺副使周憲公諭降健賊王奇約內應夜引兵舉火爲號大破賊斬首三千境內安輯公卽上疏請蠲租八年

桃源賊起江浙間執兵備吳廷舉總制俞諫請邊兵
勦賊公曰賊乏食必掠裴源積粟請贛兵自德興南
昌兵自岳源分兩翼伏裴源而令邊兵驅賊賊果走
裴源大敗遁去太監黎安欲奪公功誣公竄賊詞大
理卿燕忠卽訊廣信事白陞浙江按察使歷陝西河
南右左布政使

十五年陞副都御史巡撫遼東遼東故富饒無鹵患自
汪直開邊鹵輒携武擾我開原懿路汎河三城極殘
破公修築定遠慶雲古城鎮彝松山柴河六堡墩望
百八十一所屯田千五百頃又修中固鐵嶺蒲河撫

順諸城皆濬隍樹木爲險固東園稍寧進公俸一等
逾年請告

嘉靖初起公南臺轉南京刑部侍郎進尚書又召入吏
部尚書道改刑部加太子少保上疏論時政改兵部
尚書兼都御史代胡端敏公提督團營公惡郭勛驕
縱翦其羽翼勛愬公欲并中胡端敏公辭營務不允
八年尚書兵部時田州岑猛叛用兵兩廣騷動甚部沙
保又叛土魯番奪我哈密搖河西小王子歲入塞公
與端敏公相繼本兵同心經理戎事頗戢而慮冗食
爲蠹因大學士張孚敬奏裁各省鎮守守備內臣二

十七人錦衣官校旗勇內府詭匠數千人此皆破祖宗法依城社坐耗國儲股民膏血大蠹衆束手閉目莫敢誰問者公恃上聖明一旦剪剔去騰驤四衛者詭冒依附奸欺不可詰公言宮府一體請官軍考選清覈並如旗手等衛制曰可內臣麥福言四衛禁軍隸兵部不便往歲彰義門破鹵東市勦曹賊皆四衛功以直內故得號召易集下兵部再議公執言往歲之事正以兵權歸閹人致亂彰義門之戰由太監王振東市之賊卽太監曹吉祥也上從公議

九年大風晝晦上恐懼憂邊詔問公答曰聖祖有訓謹

避胡戎去歲冰合北鹵盡入河套以故陝西邊患延
寧固原爲急甘肅軍餉專仰河東宜於蘭州及時糴
貯以備河西災窘曩時河西患苦土彝番今亦卜剌
又深入兩寇夾擾孤危益甚海賊套賊出入殺掠並
經莊浪被其殘害急宜繕塞設險斷臂絕踵使相隔
絕兀良哈最近京師不善撫卽爲門庭之寇雲南安
鳳之叛軍民困敝曠日持久恐釀成大患交趾世子
流寓老撾異日歸命請援或據地求封皆未可測惟
用人理財早爲警備以保社稷幸甚庚戌之變人皆
思其言之奇中

十年議耕桑禮詔問公答言禮有儀文政有根本惟上下儉節墾田興水利足民衣食今日急務議郊禘又詔問公以傳經術順人心對公楚人有名上稔知公幾欲用爲吏部尚書不果是年春充正使冊九嬪晨起趨朝暴疾卒

公學有源委才無枝柱提兵南北曉暢軍事通達國體議論英發潔廉自守家無餘貲子敎益府長史

少保胡端敏公世寧

字永清仁和人弘治癸丑進士官至太子太保兵部尚書卒年六十三贈少保謚端敏

公舉鄉試故事計偕者給路費百金公以漈青竟辭其半明年第進士歸例得坊其門耻謁鎮守中貴人棄之去

初爲德安推官時岐王開國世務方殷且羣從素驕公惟謹禮明法感以至誠曰此朝廷法卽殿下家法某何敢縱此朝廷民卽殿下千百年立國根本某何敢不恤衆由是憚其正而服其公

陞南京刑部主事上言士風之邪正係天下之安危今我國家承平日久朝士安于養狃于因循廉節掃地趨媚成風以通達爲高致以廉退爲矯激以推姦避事爲老成以黨惡和光爲忠厚其羣居言行所及心志所向不曰陞官必曰成家其有語及國事當憂民瘼當恤者則衆怒羣猜百舌排斥不曰生事則曰好名使必無所容身而後已至于公差所過地方則論有司奉迎遲速以爲賢否事竣回還原籍則視官府囑托行否以爲毀譽以此賢否混淆是非倒置天下不治民生不安實由于此可不亟思所以挽回之

乎歷郎中與李承勛魏校余祐友善時稱南都四君子

弘治十八年春詔求言公條上十事其一言立賢無方
先朝李賢薛瑄入內閣不由翰林翰林如胡儼劉球
不由庶吉士年富以教官爲給事中王翱以大理寺
正復爲御史今一切敘轉專泥科條以故才賢抑塞
乏人佐理

出爲廣西太平知府太平瘴鄉又多土官苗僚性輕亂
而黠公至則馭以威信畧去文法李濬太平酋豪也
叛殺掠吏士積不服公誘濬中表兄趙元堦使擒之

散其兵四千歸農思明叛族黃文昌等四世殺土知府占三州二十七村地土知府黃暘更服事之至是畏慕公欲來歸總兵康泰因遂執其兄弟三人文昌懼反來奪公守孤城危甚而屬邑土兵嘗被公德者聞之奔命遠來一夕戈甲滿山谷於是文昌請降歸所侵地而黃暘乞爲公養子矣土官世襲輒轉展結勒索賂土襲土襲以故怨叛益輕中朝人士公令土官生子卽聞府子弟應世及者年十歲朔望或有事調集皆得携見太守太守爲識年數狀貌父兄有故按籍爲請土官大悅服內艱歸土人走送者數萬服

關北上過滄州會流賊攻州公入城爲州防守賊攻城不能破去

補寶慶知府值巨璫偕鎮守至郡縣集夫千且裒金餽之公咸罷之接以常禮鎮守王潤肆橫索公折以法潤斂手他日其從人以左道寓郡公執之恣射平民者又執之潤銜深而猶稱公好官云郡屬糧則繁漫奸不可詰公類田均糧而畫一徵之民省歲供之半闔境大呼曰太守免我糧矣

擢江西按察副使備兵東鄉時華林瑪瑙桃源盜大起而都御史俞諫用兵久無功公鋤強撫順遷縣築城

民賴以安柄兵及同事者忌公功不悉上公不自白也

時寧庶人有逆謀公上平賊二策惟勦與撫今素無定見恩威倒施事多轉展賊益無忌憚惟舊撫者不剿再叛者不撫新起者必撲滅于微持此三端官有定守民有定志戢戰興農救傷卹困治安之效可尋崩解之亂可息不然民窮財盡兵連禍結恐江西之患不止盜賊最可憂者天旱日久千里赤地水泉亦竭田禾無收麥種難下來歲民饑賑救無備省城被火延燒萬室基地所便盡歸王府債負所責問閭破家

莊田所逼村落結寨三司官多被鈐束錢穀刑名奉
行府案近者買辦漸行於外府騷擾遍及於窮鄉臣
恐此不善處則良民不得安生聚爲大盜臣下懼有
隱禍多懷貳心禮樂政令漸不自朝廷出矣寧王懿
親多才豈有毫髮過議但內外臣僚輔導非法自因
逆瑾得復護兵以來威勢日盛上下官司承奉太過
乞推才望大臣兼任提督巡撫假以便宜統御將帥
調度兵食激揚清濁易置官吏并新舊盜賊應勦應
撫或先或後悉聽計畫區處更乞戒諭賢王崇謙遠
嫌遵祖訓止治其國三司以下政務不須干預嚴戒

下人格守禁例凡遇王府發放事務必須奏准方許奉行庶宗室有磐石之固九重紆南顧之憂疏上宸濠大懼徧賂權奸朱寧蕭敬張銳等及兵部尚書陸完都御史石玠坐公誹謗妖言離間罪必欲殺公公先是已陞福建按察使乞休未得允歸抵家宸濠徧遣兇徒挾上旨襲公巡浙御史潘鵬附宸濠盡囚公家人索公甚急會李承訓爲浙按察使匿公變姓名間道歸命京師得不死下錦衣獄公獄中三上書言江藩橫逆朝野皆聞微臣慙愚天日共鑒兩京言官程啓充徐文華輩並疏論救諸奸亦懼後事未可知

公得出獄謫戍瀋陽居四年宸濠果反釋公士伍薦
除湖廣按察使未任擢僉都御史巡撫四川尋召爲
吏部侍郎以父喪歸

世宗新卽位公自喪所上言大禮之議惟在聖心獨斷
早定之而已或謂當考孝宗使獻皇承統亦將考孝
宗乎或謂獻皇不得推尊傳不言武王追王之典乎
或謂宜系興國於帝后之上獨不曰興國者先朝之
封建帝后者今日之推尊隆新典而仍舊號可乎或
謂仍祀安陸獻皇止陛下一子宜躬孝享而乃別廟
于外藩可乎書言蓄疑敗謀惟在聖明獨斷早定之

而已疏入上嘉之

遷兵部左侍郎公前後累上疏多軍國大計不爲浮冗切中時弊而近幸多不悅者乞改南京吏部數月遷南工部尚書詹事霍韜薦其賢召爲都察院左都御史入見首勸上虛心以執中使喜怒賞罰發皆中節及論聽言用人之道上嘉納焉

執政請禁私謁公言臣官以察爲名人非見其貌聞其言無繇知其心識其才若謝絕過從徒采浮言按考語而求激揚舉劾之當難矣上是而從之

公之再召也執政有力焉公終不與黨入臺閱月復改

刑部尚書公卽以災異求退因言十事一勸上日閱大學衍義二久任巡撫守令并寬其文法三久任布政使徑陞九卿等官不必再推巡撫四分巡僉事三年間專管一道不必更移五陞除有司官就于近地以便之任六布按二司只于所在衙門陞轉不必南北交遷七才力不及官量調相宜處所不可置諸遠方八邊方布按二司佐貳宜越資用使之諳練邊事以備邊鎮巡撫九廣西四川雲南司府州縣官宜選用有精力諳土風者不可槩用衰老貪懦之人十嘉靖二年五年二次考察黜退官多剛正有爲之人宜

與養病休致者一體令大臣科道保舉推用疏入上
優旨答之

永嘉惡陳九疇公力爭九疇忠勇有功河西不可殺勞
臣快奸回輕中國九疇得不死轉兵部尚書加太子
太保力辭至三疏言外鹵方強內憂日甚天下之人
闐然皆無忠義之氣我朝尚書兵部者臣鄉里所聞
方賓于謙耳目所逮劉大夏彭澤忠力爲國不得保
全其幸免者依阿軟媚坐視養亂者也援姚崇李綱
故事上定武畧崇憲職重將權增武備更賞罰御土
藝足邊儲絕弊源正謀謨惜人才十事要說

土魯番劫曲先衛人牙木蘭爲將牙木蘭擁懷內徙歸
我土魯番遣使來而大臣卽欲縛牙木蘭與之易哈
密公議曲先衛本中國羈縻牙木蘭反正歸順非納
叛比而哈密室城懸遠無益事實土魯番善賈多巧
術往往以珍奇啗時貴自成化至于今中國爲彼欺
負今欲甘心牙木蘭以携貳我屬彝而以哈密爲餌
釣大利宜勅王瓊爲國忠謀先盡復瓜沙羽翼之地
悉收亾失屬彝封植哈密永爲不侵不叛之臣而後
請勅降印庶不辱王命且土魯番方恫喝中國懸衡
諸彝但遠越流沙烏合難久我大震威畧以離其黨

購賞義附使相破滅此伐交之術正宜厚牙木蘭以
風蠻彝及薦馬吳施儒楊必進及九疇爲將皆報聞
公議哈密與南海不合論亾部功王浚川以爲發其過
大不喜薦賢才安仁以爲侵官相壓亂政發怒訴于
朝昌化嗣伯下廷議公言吾輩不得以厚賂故誣朝
廷安仁變色大沮以故諸大臣皆忌公公自度不得
行其志決意辭疾去賜勅給驛續輿廩歸無幾召理
南京兵部事復辭乃止卒

公自贊云信而未孚者多言也正而未諒者多戲也周
而若比者好稱人之善也恕而若刻者多發人之奸

也過有甚於此者輕賤龔疎也然則無一長可取歟
曰瞞人之事弗爲害人之心弗存有利於國之事雖
死弗避三者吾將持是以終身焉而前數者氣質之
偏則亦庶乎其有改也卒不媿其言又曰學以經濟
爲主不專在詩文也

公朴忠直諒氣壯才雄澹泊寧靜清素不淆席文襄稱
公論事如結舌草奏如懸河邵康僖曰胡公疾惡如
讐善則猶已誠爲確論

幼極艱苦寄食就學卓有經濟之志仕幾四十年雖祿
一品被服飲食猶素士也

次子繼幼讀書不大了了父亦棄之公調兵至江西兵官以公出見繼繼曰兵素不習安能見我父哉兵官跪請教繼乃指示進退離合勢甚詳凡三日而公歸閱大異之顧兵官非能曉此者以詰不能諱其實告公歎曰我有子自不識何也自是擊賊必從繼方畧公十不失三繼策十不失一也公之上寧王事繼跪曰疏入必重禍奈何公曰吾業以身許國矣疏到公下獄是歲繼因念父病死公母獨不哭曰此子在當作賊胡氏滅矣

尚書伍忠襄公文定

字時泰號松月湖廣松滋人弘治乙未進士官至
兵部尚書兼都察院右都御史天啓中追諡忠襄
公生有膂力善騎射知兵法議論慷慨氣屹屹不能下
人初爲常州府推官以簡伉忤提學御史陳琳左遷
後起陞嘉興府同知而陳亦來爲郡守相見握手道
舊歡若平生彼此各無帶芥時兩賢之

知吉安府吉安江右大郡民好訟鄉宦林立事多掣肘
最號難理公平心率物搏擊豪強撫安良善郡中稱
治

時吉安多盜公至卽擒永豐巨寇賴招壽等四百餘人
平桶岡賊得渠魁謝志山等宸濠反天下莫不震動
公號於衆曰吾儕以死報國正在今日會巡撫南贛
陽明王公適往勘閩事至豐城聞變回舟急趨吉安
與公謀起兵討賊公言于陽明日兵法攻其所不備
今濠旣出當先攻南昌破其巢穴彼必回救我師邀
擊取勝之道也陽明然之十八日陽明發兵臨江十
九日誓師焚勦西山二十日兵入省城城門不守二
十一日濠兵還至黃家渡二十五日公率舟師迎擊
之二十六日公復以火艦襲之火燎其鬚不顧仍指

示贛兵登岸夾攻于時烟焰漲天湖水盡赤殺聲震地山岳爲搖濠兵解體濠遂爲公部下知縣王冕所擒李士實劉養正等皆以次就俘捷聞陞江西按察使晉南京操江都御史久之以疾致仕得旨遂行

明年起爲兵部右侍郎陞右都御史屬雲南有安鳳之亂陞兵部尚書兼都御史提督雲南川廣軍務未入境賊平時亡部屢不靖公欲乘兵力勦之以伸威百蠻四川按臣戴金力言其非上遽降旨罷兵召公還督團營因乞休許之至是卒詔賜祭葬如例公孤忠自信遇事敢爲不能與時俯仰故功烈甚著然以粗

悟終其身爲志士所深惜云

尚書姚公鎮

字英之號東泉浙江慈谿人弘治癸丑進士官至
兵部尚書太子少保卒年七十四

除禮部主事大宗伯傅瀚特重其文學凡四司議稿必
屬裁訂十五年陞本部員外十六年陞廣西提學僉
事桂士孤陋不知向方自簡其俊秀課之立宣城書
院于省城延海內之有名者日相與進德修業嚴蒞
而厚給之諸生感奮舉科第益衆

桂人重巫鬼山魃卓旺善爲變巫覡假以惑民公至爲
文屏除之痛治諸巫而妖息

庚午陞福建按察司副使汀州大帽山賊攻武平八閩
震動公率鄉兵赴救賊走江西破南豐新淦樂安諸
邑永定民賴師智者所部五百人無不一當百先爲
國禦賊多戰死而賊又陰襲其家有司不能恤遂擁
兵自衛不復爲用公撫而用之師智請效死公適改
提學乃以兵屬憲副楊璋而卒藉智師之力盪平諸
賊

督學八閩興泉無春秋建汀鮮易學爲之延名儒分教
下邑閩中五經之學至是始全葺大儒書院增廣祀
田以恤後人又以林栗顏棫與朱子爲氷炭而學宮

猶有祀之者悉命斥之

正德九年吏部旌方面官以勵天下僅十有五人副使
獨公暨湯公沐徐公蕃而已陞貴州按察使持憲嚴
明鎮守太監史泰戒輯其下宣慰安萬鍾畏其威名
股栗不敢仰視覬離宣撫栗友播州宣慰楊斌不協
友死其子弘束身謝罪以自表于朝公謂宜授弘以
舊職使撫其所部而嚴與之約以遏其無厭之求衆
善其策已而好事者抑覬扶播不用其議覬離始憤
怨以兵攻破播州至十餘年而後定始服其策

十年陞福建右布政使十一年陞山東左布政使京邊

轉輸朝至夕遣吏無所行其詭守藏吏以銀四千兩
舊無標識密送私所正色斥之籍其數千撫按不以
家累自隨者五年囊橐蕭然

武定州山東南北之衝公謂宜設兵備官防盜乃上議
都御史黃瓚請之朝本兵以不先白已謂兵備安能
弭盜寢之公謂安有不設官遽謂不能制盜遂逆止
耶更上議竟得俞旨

青萊郡災有司不特奏戶部率以限外停格公爲代奏
如期由是被荒者皆得減免

臨清倉舊設內臣監守止一二人正德十年以後增至

十五員公爲條奏極言其弊上得奏爲下勅戒飭至再民困少紓巡按御史議論與公不合擱拾他事劾公都御史王公璟曰吾山東人稔聞姚廉家宰陸公完曰今天子在邊姚材畧不易得奈何求無形罪肆私怨乎御史語塞

武宗南巡跼蹐臨清兵衛數萬公儲蓄有素民不告勞上奇公狀貌錢寧江彬恃寵索賄每銜公一日公舟觸御舟上命執之問爲誰舟人以公對上曰是美髯者耶釋之

銓曹擬公巡撫延綏都御史上問兵侍王公憲曰姚鏌

南人得無不習風土憲對曰鎮文武才不擇地而辦
庚辰公至榆林上先以十萬衆駐蹕其地公私交墮
各郡皆饑公調度兵食人不知擾延綏士卒素忠勇
公厚撫之月給糧餉遣人督送其家凡將領不得私
役一兵驍勇士悉引見勞慰由是人樂爲用

嘉靖壬午鹵寇涇陽全陝震動言官舉劾諸鎮將吏上
遣都御史李鉞行邊公乃以遊擊彭英勇畧使率所
部出西路釋指揮卜雲于獄爲英貳皆誓決死戰偵
鹵方寢前鋒過其壘砲發鹵悉衆而南前軍返襲其
後英等大軍乘之斬首八十餘級鹵衆悉引退捷聞

上降勅褒獎賜白金文綺諸鎮由此皆貲其罪人謂
榆林四十餘年所未有之功

延綏土人于瑾耕地得金磚金甲諸物云其下有隧道
數曲有巨室三楹東西皆金銀堆積中則金甲冑數
十又有金耳環如今製而長者數甕所積以千萬計
蓋西夏金元故物也姚僉憲欲請之朝實邊公以爲
嫌命厚封其處

召爲工部右侍郎提督易州山厰時浙江布政方良永
以劾錢寧家居爲言於朝令有司優禮之又以薛文
清理學爲本朝之冠請配享孔子廟廷輿論翕然稱

公

乙酉陞右都御史提督兩廣軍務兼理巡撫田州土酋岑猛者初朝廷調征江西之姚源納賊重賂縱賊逸去後猖獗流毒數年猛富甲諸酋遂侵占鄰境屠戮土官結納逆濠抱諸不軌上恩思恩土酋之叛猛陰主之軍門調遣不復聽命且揚言兩廣本吾土也暫假朝廷終當取之于是巡按御史張鉞汪淵內外鎮守重臣奏發其罪調湖廣永保兵勦之公旣至兵備單弱倉卒調集兵糧訛言洶洶乃遣使檄徵猛兵弛其謀且諭猛自歸待以不死猛終不聽公乃上疏陳

猛愈肆不恭罪在不赦會永保兵至公自督師進破
定羅丹梁猛子邦彥率驍將常好陸綬列十營拒戰
公師奮前大破之斬好綬衆潰猛奔歸順土官岑璋
煬猛傳首南寧奏上嘉公功進左都御史太子太保
廕一子錦衣衛百戶班師

遺酋盧蘇招他部王受叛執署田州事王熊要詔赦于
公公謂交南麓川旣平復叛姑息致然二囚不誅何
以懲後復請進兵巡按御史劾公失策致再亂又謂
猛常存爲禍非細館閣大臣信之而以王公守仁代
公請致仕允之

十二年春上有起用之旨大學士費宏再相值三邊缺
總制尙書上召費與李時冢宰汪鉉於西苑議之費
首以鎔對上慨然從之比聞命卽就道公善于馭士
如寧夏王効固原梁振榆林劉文皆從行伍中拔之
爲彘狄所憚而有功必賞樂於聞善一時軍士願爲
效死十五年正月奏寧夏鎮遠關之捷二月甘肅馬
鞍山之捷復以老乞歸上疑其避事峻旨切責令閒
住門生遍海內皆捐捧金爲營書院于慈谿東山之
麓十七年五月以病卒

尚書王肅敏公廷相

字子衡號浚川儀封人弘治壬戌進士官至太子太保兵部尚書兼左都御史

選庶吉士時方有邊警閣試擬經畧邊關事宜疏公卽明指利害陳權宜振刷之策疊疊數千言當道者覘其有經濟才授兵科給事中言事無所忌諱謫亳州判官陞高淳知縣又陞四川道御史巡按陝西能約束鎮守內臣廖鑾爲提學御史焚內臣劉王私書遭誣構下獄再謫贛榆丞

巡撫四川覃恩布信撫輯有方沙保向訊倡亂公往勦

平之宥降散衆彙境遂安

陞南京兵部尚書革內外守備各監局科尅役占諸弊
軍民如出塗泥中以魏國守備年久宜如各處文武
官推代奏入上遂更置

陞都察院左都御史兵部尚書督十二團營兼掌院事
慎選差明憲體以臺政分條類奏上允行考滿加太
子少師其于營務修舉廢墜明作士氣無敢私役科
害者會吏部一考察京官兩考察外官皆飭覈精當
奔競歛迹辛丑罷歸抵家閉門讀書對親友不言宦
蹟時遊東園會客葛巾野服訴訴焉

公德器宏粹氣稟剛大修身立學以聖賢自期不事浮藻徬搜遠覽上下古今唯求自得無所循泥灼見其是雖古人所非者不拘灼見其非雖古人所是者不執立言垂訓根極理要多發前賢所未發焉

公與張元傑都諫書云承集議大禮之教僕不敢放言但禮云適子不後一子不後大宗不得奪小宗今然乎不然是變禮矣以禮之變者處天子而以禮之常者處天子之父而曰爲人後者不得顧私親可乎不可乎利天下之尊突然使其親絕祀使今議禮諸君子與吾執事自處其父母將且爲之乎僕意不但諸

君子與吾執事不肯爲凡有仁愛之心者決不肯爲
矣此于治體所傷匪細不但係一時文字得失而已
也蓋旣以變禮處天子亦當以變禮處天子之父此
爲適均漢宋二代事情與今迥然不同豈可執一而
論此在當國者一轉移之間可以立萬世之大防執
事今在議禮之次漫以此義奉助

與張羅峰閣老書云公受知主上雖古昔夢賚之賢魚
水之懽殆不是過飛詔再起聖心拳拳所毗賴益篤
矣伏自大賢弼丞以來援稽古典矯正時弊闡穆祛
除精華宣朗出自巖廊之上達之溥天之下蓋純然

一變而改觀矣此固主上聖智聰明總攬乾綱所成而公卽心啓沃秉猷入告之功亦不爲少也以愚言之方今天下之勢如治病然劫毒之劑旣投沉痾之痼已脫脉息內融精神外灼已十得八九矣所欠者安靜調適以保養其元氣爲急務耳然安靜工夫僕不敢盡言惟公急其先務主上掄其簡約則天下受福奄在目前

公嘗曰大識者外僞不能累大氣者外侮不能動大德者外物不能遷又曰權所以運國勢紀綱所以係國脉人才所以主國命故國之不亾者三權不下移紀

綱不墮不用小人長國又曰迂儒強執不識古今之
宜鄙儒依阿不顧國家之計俗儒淺陋不達治忽之
機皆不堪委任又曰儒者貴識義理貴識治要識義
理則父子君臣之道不虧識治要則興衰成敗之幾
不迷又曰志不存乎天下者不可以言用道不本之
經術者不可以言治政不要之安民者不可以言仁
時皆以爲名言有家藏集若干卷

尚書熊恭肅公浹

字悅之號北源南昌人正德甲戌進士官至吏部尚書卒年七十七隆慶中謚恭肅

幼質穎敏博學尤精於易爲文詞清勁以儒士舉正德丁卯鄉試甲戌第進士拜禮科給事中持議謇諤一時權奸沮懾已卯宸濠以南昌叛初濠之異圖也錮公及御史熊公蘭至親爲質又陰結朝貴阻絕封事巡撫孫忠烈公疏七上不達公曰伐謀貴豫否則羽翼已就難圖矣一日公偕熊公密授草御史蕭公淮上之濠大懼洩露遂發兵反不再月果擒

儉人江彬等導武宗南狩公倡朝臣累日伏諫不已奉
命查核松潘邊餉總兵某者怙勢侵冒動以萬計公
廉實狀聞寘之法

嘉靖壬午詔討求追崇典禮朝論準治平間安懿故事
公在蜀聞之抗疏論今上承統御天弗緣所後而禮
濮國不得考于宋英今獻皇豈濮國比哉反覆以倫
理天性辨之遂與輔臣牴牾出補河南右叅議至則
起瘵招逋弭訟時部境寇作公曰安得以職守分彼
此耶卽勒兵捕之會丁艱歸

丁亥召修明倫大典公乞終制次年大獄明擢都察院

右僉都御史偕嘉魚李公講求振刷臺憲一新明年
陞右副都御史大典成轉左副又明年轉右都御史
掌院事七閱月有人命獄成于厥衛羅織者勅下法
司會鞠衆依違公獨奮筆曰殺人以媚人弗爲也力
白其枉旣重忤中貴而忌公者因擠之遂罷免

己亥駕謁山陵御行殿召近直追論舊臣上曰浹老成
諭吏部起用尋陞南京禮部尚書句曲人王某者疏
欲表揚朱家巷以崇國姓公曰天親不可以人爲今
日久跡湮涉牽合非禮也遂寢其議廷論韙之

庚子改南京兵部尚書叅贊機務考核軍政去留當材

明倫彙編 家範典 卷一百一十五
品人服其公又奏減龍江淺船餘下幫甲若干以甦
困卒又禁和買罷諸苛法留都軍民倚重焉

癸卯召爲兵部尚書兼右都御史掌院事公愼差遣無
遠近勞逸一揆於才力曰紀綱之地將以糾正官邪
而先自枉可乎衆志遂定有巡關者聞警報托疾自
逸公遣首領促之竟無敢踰宿按歷有擅威福甚者
必貽書令省改嘗辨官民冤牘剖成案未嘗徇勢

甲辰改吏部尚書公曰太宰天下所與取平者吾安敢
臆決耶凡陞敘無小大流品日與少宰安福王公華
亭徐公及司屬之賢者共焉每每注選必語所司曰

此缺相宜否如否雖十易之何害尤獎拔寒峻惟恐其墮落臺官自嘉靖初部使者舉刺漸廣公曰非制也其敝有司炫威市恩不免矣請凡中差論列苟非其專職無濫及遂著爲令公在部院京察二外察一皆蒞以公嚴京察惟黜其行誼尤無良者有直道被誣者公必辨救之凡遇姦人傾陷善類公皆昌言正色諍而全之衆皆悚服

乙巳滿考六年加太子太保八月疏斥箕仙之妄忤旨惶恐待罪至十二月固乞休遂遣官校械繫以歸執張役在田凡十年足跡不入城府每見邸報知時事

災異輒憂形于色尤以未報國恩爲恨每厭術數之
學好觀程朱語錄體驗于身心以是臨大政決大疑
確有原本蓋以抗直任事以惠利救時識其大矣

侍郎潘公希曾

字仲魯金華人弘治壬戌進士官至兵部左侍郎
卒年五十七

選翰林院庶吉士除兵科給事中武宗登極時聞豎初
熾有故太監汪直義男汪玉乞陞錦衣衛鎮撫帶俸
守塋者卽首疏奪之其畧曰世祿以及子孫鬼神不
歆非類內臣本無後而強求世祿之恩義男本異姓
而欲冒他鬼之蔭疏上中官切齒恨之又上疏勸武
廟隆大孝勤聖學節遊樂遠佞倖振因循懲玩法備
鹵寇厲士節八事逆瑾遂決謀中傷

正德丁卯差湖貴二省計處備儲陞吏科右給事中時
瑾虐焰方張凡差者必重賂以求免禍有司亦爲備
千金公毅然却之曰我爲諫官未能除君側之惡我
之罪也奈何復助之乎瑾諷公多叅劾爲招賄地不
從遂大怒矯命械繫詔獄拷訊百端欲寘之死逮杖
闕下公暈未甦瑾快示其黨曰此後生潘某也死矣
左右負以出卽日除籍爲民時見瑾者雖公卿必屈
卽被謫遣亦必辭以行獨不往旣還鄉里杜門不出
日惟課子弟讀書居後傍水有佳竹蔭可息間招親
友觴咏悠然自得因自號竹澗居士

庚午瑾伏誅明年詔起刑科右給事中甲戌偕甘泉湛公奉詔持節往使安南錫麟袍玉帶以行尋陞禮科左給事中旣入其國先諭威德正禮儀然後致命紀事觀風有南封錄復命陞工科都給事會內官監奏請修大素殿天鵝房諸役費累鉅萬抗疏力爭之其畧曰方今邊儲告匱冗食日繁山東河南近經兵燹江西四川未復瘡痍况營建乾清坤寧二宮大木采及于遠方工科派遍于天下若復別興土木誠恐民不堪命疏上不報然無益之費自是少息

丙子擢南京太僕寺少卿先是滁和之民困于買馬爲

奏更折色民大稱便而馬課視昔亦易完在滁凡六年不調世廟御極擢本寺卿嘉靖癸未遷南京太常寺卿期月改北提督四彝館乙酉晉右副都御史提督南贛汀漳等處軍務賜璽書斧鉞以行至則明號令修器械時簡教擇謀勇信賞罰以爲備先是壬癸之亂招撫新民衆多各巢連和漸以猖獗爲民害公鑒昔日之弊務馭以誠信其有自相告訐者則聽之以離其黨舊有功未賞者有司或吝出納悉令賞之于是惠州黠寇賴貴聚衆肆虐公發兵洗其巢穴奏凱上嘉悅賜金幣慰勞焉洎頭餘賊蝟興流劫江廣

乃發諸路兵夾勦賊大懼襲通判董鳴鳳以要我撫
公曰此賊故智欲援我師耳昔人常墮其計可復蹈
乎乃下令曰通判自償事不足恤然有能掖之出者
悉宥之益督進兵戰數合賊大敗生擒渠魁餘黨奔
竄通判卒獲全乃籍其田業貧民審其脅從者分配
內地全活甚衆

召入爲工部侍郎旣還朝時河水汎濫漕渠弗利任事
者方興新河之役費且數十萬死者數千人人心皇
皇歲運不繼旣受任誓殫慮畢力濟大事夙夜兢業
考故詢謀遂決策上疏謂河流故道非一其大而要

者若孫家渡趙皮寨乃上流之支河也沛縣飛雲橋
乃下流之支河也弘治以前三支分流會于淮而入
海故徐沛不受其害邇來上流二支俱就湮塞全河
東下併歸飛雲橋一支下束徐呂二洪上遏閘河流
水溢爲游波茫無畔岸于是決隄壅沙大爲漕患今
日之計固當挑濬舊漕以通漕運加築隄岸以防衝
決然非疏上流之支河將來秋水復發沙雖挑而難
保其不復淤隄雖築而難保其不復決探本之論固
有在矣上嘉納焉至濟卽達觀徐沛淤漕閱新河險
阻沿黃河出豐單以求決鬻奔衝之迹洞悉利害而

得其要機遂築長隄起單至沛凡百四十餘里時建
議者欲別遣官相度意在阻公適有旨下公計處乃
復上疏其畧曰漕渠廟道口下忽于數十里者由決
河西來橫衝掣閘河水入昭陽湖以致閘水不復南
流而飛雲橋之水時復北漫故沙停而淤也今宜加
築東隄以遏入湖之路更築西隄以防黃河之衝俾
其自北而南常由故道則沙不復淤矣臣愚且拙不
敢求新奇之功不敢爲苟且之計惟欲因舊以爲功
從省以濟事順水性以除患故舍新河而修舊漕者
圖其易也沿黃河爲隄者防其溢也停築派夫十數

萬僅用河夫二萬餘者恐民勞也罷顧募而行犒助者慮繼費也上復納之不期年而功成沛漕流通歲運如故

己丑秋境山河忽西徙三百步亂石絕河湍射下數仞雖虛舟不得上有冒險而下者十覆三四遠近駭懼舟戒弗行公命穿故河廣十步以通水稍截徙河逼之東兩涯下埽以漸相屬及兩埽逼河流激盪乃決入故河奔放衝滌一夕河廣一倍二三日盡復其舊御史傅炯疏其費省而成速上紓九重漕河之憂下遺一方民田之利上乃加尚書俸級仍總理其任冬

陳疏乞骸不允

辛卯春召改兵右侍郎五日而部署災時堂屬多被逮
公以一身疲衆務收燬散之圖書防夤緣之奸弊罔
有餘力是年秋陞本部左侍郎冬勅督理仁壽宮役
力疾趨事日不遑暇壬辰三月十九日傳制賜進士
朝服侍班是日省宴進士同日具始歸有頃不起年
五十七訃聞贈兵部尚書賜祭葬所著有竹澗集若
千卷

明名臣言行

卷第四十八

終